

EFESIOS

Jesucristo ja'apiyá jema'ajeño Éfeso e i'imakáñojlo Pablo wakára'a puráka'aloji marí ke i'imaká

1 ¹ Jesucristo wakára'akarena riyukuna i'imajé nakiyana nuká, kaja keja Tupana pechu nakú nula'akana i'imakale. Nulana'á iká Éfeso e i'imakáñojlo marí puráka'aloji. Jesucristo ja'apiyá jema'ajeño i'imakale, iká i'imaño pajluwaja keja rijwa'até. ² Nuwata wara'apá Tupana, wawakára'ajeri Jesucristo wa'até, la'aká ipechu palá napalamane aú.

Palá wani Tupana la'aká ina'uké yukuna marí

³ Palánijla kaja wapura'akojla Tupana, wawakára'ajeri Jesucristo jara'apá, nakú palá wani. Palá wani rila'aká weká, Jesucristo wa'atéjena we'emakale. Chuwa pajluwaja keja weká rijwa'até, ñakele rila'á wapechu palá ke'iyapejé nakaje aú, je'echú chu i'imajíkaño we'emajíka. ⁴ Unká chiyó Tupana keño'ota eja'awá i'imaká, kaja riwe'epí Jesucristo le'ejena we'emajika. Unká japi la'alaño pu'uaré keja weká rijló, ñakele unká na chona kalé riwajaje weká, íki'ija riwátakale weká, ⁵ Ripechu nakú ri'imá, ra'akáloje weká riyaniwá penaje kaphí Jesucristo chojé i'imakana aú. Palani rijló ilé ke wala'akana palá, kaja keja riwátakale ri'imaká wajló. ⁶ Ñakele palánijla ñakeja Tupana nakú pura'akano palá, ripalamane we'emakale. Ri'irí, íki'ija riwátakare, palamane aú rila'á wanaku palá wani. ⁷ Jesucristo taka'aká a'awaná apiyákakanami nakoje wachaya wakajé, kajrú rira i'ijnaká itapuwa aphumi chiyá i'imaká. Rira palamane aú ri'imatá weká; ripalamane kaja Tupana amaro wachaje, piyuke pu'uaré wala'akare liyá. Ilé kaje aú wawe'epí íki'ija wani Tupana wátaka weká, ri'imatákale weká kapichákajo liyá. Íki'ija wani riwe'epika wamu'ují i'imaká; unká rimejñátala na waliyá. Ra'á wajló we'epíkaje, ripalamane aú wawe'epíkaloje palá piyukeja nakaje rila'akare nakoje. ⁸ Palá wani Tupana la'aká wanaku. Kapechuni

wani riká; piyukeja riwe'epika nakaje nakojé. Ñaké i'imakale, rila'á piyukeja nakaje palá, ripechu nakú ri'imaká ke.

⁹ Chuwa wawe'epí riwakára'aka Jesucristo marí eja'awá chojé, raú rila'akáloje ina'uké nakú palá. Ilé ke la'akana i'imá ripechu nakú júpimi i'imaká. Micho'ojneji rinakojé we'epíkana i'imaká ina'ukejlo riwakajé. ¹⁰ Riphájika rená chojé wakajé, Tupana ñapátaje piyukeja nakaje la'akana ripechu nakú i'imakare. Raú rawakátaje piyukeja je'echú chu i'imakaño, maare eja'awá chu i'imakaño wa'até, Jesucristo i'imakáloje nawakára'ajeri wani penaje. ¹¹ Júpimi Tupana i'iwapari we'emaká rijluwa ajopana ina'ukena e'iyayá, we'emakáloje rila'ejena ina'ukena nakiyana penaje, ripechu nakú ri'imaká ke. Ñakele rijwa'atéjena weká Jesucristo palamane aú, kaja júpimi eyá, ripechu nakú ñaké wala'akana i'imaká. ¹² Weká judíona nakiyana pechu i'imá kaphí Jesucristo chojé, ajopana tukumá. Ilé ke ri'imaká wajló, we'emakáloje palá wani rila'akare weká yukuna ajopánajlo penaje.

¹³ Palá Tupana la'aká iká Jesucristo palamane aú. Ri'imatá iká kapichákajo liyá, jema'akale kewákaje puráka'aloji ja'apiyá. Ra'apiyá jema'akana aú ra'á ijlo Ripechu, rarukákare ina'ukejlo júpimi i'imaká. Ripechu i'imaká iná e'iyá aú iná we'epí Jesucristo le'ejé iná. Kaja ra'á wajló Ripechu, rimaká rinaku i'imaká ke.

¹⁴ Ra'á wajló Ripechu, apú nakaje ra'ajíkare wajló piyá. Raú wawe'epí ra'ajika kaja wajló piyukeja nakaje rarukákare wajló i'imaká, we'emajika rijwa'até je'echú chu wakajé. Re wapura'ajó we'epiri wani piyuke nakaje la'akana nakú palá.

Pablo pura'akó Tupana wa'até Éfeso eruna nakú yukuna marí

¹⁵ Nuwe'epí kaphí ipechu wawakára'ajeri Jesucristo chojé; nuwe'epí kaja íki'ija iwátaka piyukeja Tupana le'ejena ina'ukena. ¹⁶ Ñakele numá Tupánajlo: “Pu'ují nupechu nanaku, pila'akale palá neká”, ke numakano rijló nupura'akó kewá rijwa'até. ¹⁷ Nuwe'epí kaja riliyá we'epíkaje ijlo. Jesucristo jara'apá riká; ajopana chaje wani i'imaká riká. We'epíkaje ra'ajíkare ijlo aú iwe'epeje palá rinakojé. ¹⁸ Numá kaja Tupánajlo, rila'akáloje ipechu palá, iwe'epíkaloje raú meke palá wani nakaje i'imajika iká, ri'iwapakárena ajopana ina'ukena e'iyayajlo, nakojé. ¹⁹ Piyuke wani nakaje la'ajerí riká, unká na i'imalá unká riwe'epílare la'akana. Ilé kaje we'epíkaje re kaja ra'apiyá jema'ajeño e'iyá, rila'akare aú piyuke wani nakaje. ²⁰ Ripechu, ra'akare ra'apiyá jema'ajeñojlo, aú kaja rimakápo'ota Jesucristo i'imaká; raú ja kaja riwa'a riká je'echú chojé,

ri'imakáloje rewájena wakára'ajeri rijwa'até. ²¹ Re wakára'ajeño i'imakaño, chaje Jesucristo; re nakaje minaná i'imakaño, chaje kaja riká. Piyukeja ajopana chaje wani riká me'etení, ñakeja ri'imajika. ²² Tupana a'arí riká piyuke nakaje amájeri penaje; ra'á kaja riká ra'apiyá jema'ajeño wakára'ajeri penaje. Iná wíla'aru i'imaká inajlo, ke kaja Jesucristo ra'apiyá jema'ajeñojlo; ²³ rinapona ke rijló piyukeja ra'apiyá jema'ajeño; eyá riká, newíla'aru ke kaja najló. Re Ripechu je'echú chu; re kaja Ripechu piyuke eja'awá chu, ra'akáloje ra'apiyá jema'ajeño ñathé raú.

Tupana i'imataka weká Jesucristo palamane aú yukuna marí

2 ¹ Kapichájeño Tupana liyá penájena iká i'imaká júpimi, pu'uwaré la'ajeño i'imakale. ² Ina'ukena, unká jema'alaño ra'apiyá la'ajika nakaje, ke kaja ila'ajika nakaje júpimi, raú ila'aké Jiñá Chi'inárikana wakára'aka ke. Neká, unká jema'alaño Tupana ja'apiyá, wakára'ajeri riká. ³ Neká keja kaja we'emajika júpimi. Wawátajika keja wala'ajíkano pu'uwaré; wamanáicho wala'aké wapechu keja. Riphájika rená chojé wakajé, kajrú wani Tupana wajájika piyuke pu'uwaré la'ajeño. Nanakiyana we'emaká, ⁴ e'iyonaja kalé riwe'epí kajrú wamu'ují i'imaká, íki'ija wani riwátakale weká. ⁵ Ñakele ri'imatá weká kapichákajo liyá, we'emakáloje matajnako je'echú chu rijwa'até. Kapichájeño penájena we'emakajla pu'uwaré wala'akare pachá, e'iyonaja riwe'epí wamu'ují aú kalé we'emaó kapichákajo liyá. ⁶ Pajluwaja japi keja weká Jesucristo wa'até, ñakele riwá'aje weká richajo je'echú chojé, we'emakáloje re rijwa'até. ⁷ Íki'ija wani riwátaka weká; kajrú wani riwe'epika wamu'ují. Ñakele ripalamane aú rila'á weká palá wani, ajopana ina'ukena jema'akáloje riyukuna penaje. ⁸ Tupana we'epíkale imu'ují, ri'imatá iká kapichákajo liyá, ipechu i'imakale kaphí richojé. Unká nakaje palá ila'akare palamane aú kalé ri'imatá iká; Jesucristo palamane aú ri'imatá iká. ⁹ Unká nakaje wala'akare palamane aú kalé ri'imatá weká kapichákajo liyá. Ñaké i'imakale, unká méño'ojo iná kemalá iná nakuwá: “Nakaje palá nula'akare aú ri'imatá nuká kapichákajo liyá”, ke. ¹⁰ Jesucristo wa'atéjena we'emakale, Tupana a'arí wajló wajé i'imakaje, wala'akáloje palá piyukeja nakaje ripechu nakú i'imakare, júpimi i'imaká ke.

Chuwa palá wapechu ajopana ina'ukena nakú Jesucristo palamane aú. Riyukuna marí

¹¹ Unká chiyó jema'á Jesucristo ja'apiyá, judíona kemakeño inaku: “Unká Tupana le'ejena ina'ukena kalé neká, unkale

namata'alá nakeráko'opana achiñana chinuma”, ke. Eyá nanakuwá nemaké: “Tupana le'ejena weká, mata'akeja chinúmaruna we'emakale”, ke. ¹²Iwe'epí marí: Júpimi i'imaká, unká iwe'epila Jesucristo nakoje; unká kaja Israel michú nakiyánami, Tupana i'iwapakárena rijluwa, kalé i'imaká. Nakaje rarukákare najló i'imaká, unká i'imalá ijló. Riwakajé unká Tupana i'imalá iñathé a'ajeri, ñakele unká kaja iwe'epila rinakoje i'imaká. ¹³Eyá chuwa, pajluwa japi keja iká Jesucristo wa'até, ritaka'akale ichaya a'awaná apiyákakanami nakoje i'imaká. Riwakajé kajrú rira i'ijnaká itapuwa aphumi chiyá, ripalamane aú i'imakáloje rijwa'atéjena me'etení. Júpimi, unká chiyó ipechu i'imá kaphí richojé, unká Tupana le'ejena nakiyana kalé i'imaká. ¹⁴Chuwa, Jesucristo palamane aú palá weká pajwa'atéchaka, pajluwaja keja. Ajopana keja wawe'epíjikano panakuwáaka, unká chiyó wawata pekowáaka; eyá chuwa wema'aká Jesucristo ja'apiyá aú, ripala'atá wapechu wajló ra'apiyá jema'akana aú, we'emakáloje pajluwaja yaní keja pajwa'atéchaka. Ilé kaje aú rikapichata waliyá chapú wamákare pekowáaka i'imaká. ¹⁵Chuwa, kaja unká we'emalá Tupana puráka'alo, júpimi riyuríkare, wakára'ari wani iná la'aká kajrú nakaje, ja'apiyá. Jesucristo taka'akale piyukeja wachaya a'awaná apiyákakanami nakoje aú, palá wapechu Tupana nakú rejenowaja. Raú kaja weká chuwa pajluwaja yaní keja pajwa'atéchaka, judíona, eyá unká judíona kalé i'imakaño wa'até. ¹⁶Jesucristo taka'akale a'awaná apiyákakanami nakoje ina'uké chaya i'imaká aú, rilamá'ata napechu, wapechu wa'até, rejenowaja wapechu i'imakáloje palá Tupana nakú. Raú kaja rilamá'ata wapechu pajwa'atéchaka, wamaka piyá chapú pekowáaka. Pajluwaja yaní keja rila'aká weká raú.

¹⁷Jesucristo iphari majó palani yuku i'imajé piyukeja ina'ukénajlo. Riyukuna yuró Tupana yukuna nakoje we'epéjeñojlo, eyá unká we'epílaño riyukuna nakojejlo wa'ató. ¹⁸Jesucristo wa'atéjena we'emakale, weká judíona, eyá iká unká judíona kalé i'imakaño, i'imaño pajñakani wara'apá Tupana awa'á, Ripechu i'imakale wajwa'até.

¹⁹Ñaké i'imakale, weká'ana ke kaja iká, Tupana le'ejena i'imakale chuwa. Rejenowaja rila'aká wanaku palá. ²⁰Tupana puráka'alo ja'apátajeño michuna, Jesucristo ja'apiyatéjena wa'até, yuriño wajló Tupana puráka'alo, raú wawe'epíkaloje rinakoje. Jesucristo palamane aú rijwa'atéjena weká chuwa. ²¹Nachaje, nachaje ke, íki'irunacha ra'apiyá jema'ajeño; pajluwaja nakiyana keja weká pajwa'atéchaka. Rile'ejena ina'ukena weká, wapechu

i'imakáloje pu'ují rinaku raú penaje. ²²Iká, unká judíona nakiyana kalé i'imakaño, chuwa Tupana wa'atéjena kaja iká. Chuwa Jesucristo ja'apiyá jema'ajeño i'imakale, re kaja Tupana Pechu e'iyá.

Pablo jápaka'ala yukuna marí

3 ¹Ilé kaje yukuna i'imakana iká, unká judíona kalé i'imakañojlo, jimaje naka'á nuká ina'uké wajákelana chojé. Richu nuká me'etení. ²Kaja iwe'epí Tupana a'aká nuká riyukuna i'imajeri penaje, riwe'epíkale imu'ují. ³Júpimi ripechu i'imá unká judíona kalé i'imakaño nakiyana nakú la'akana palá. Eyá nojló ra'á pu'uwaká nakaje ripechu nakú i'imakare; kaja nulana'á ijló riyukuna nakiyana i'imaká. ⁴Rijwa'até pura'akano aú iwe'epí nuwe'epika nakaje, me'echuje i'imakare ina'ukejlo, nakojé. Chuwa, pu'uwaká wajló riyukuna, palá wawe'epíkale Jesucristo nakojé. ⁵Júpimi, unká na kalé pura'ó riyukuna nakú, me'echuje ri'imajíkale najló; eyá chuwa, Tupana a'arí pu'uwaká wajló riká. Ripechu aú ri'imá riyukuna riwakára'akarenajlo, ñaké kaja riyukuna ja'apátajeñojlo. ⁶Nakaje, me'echuje ke i'imakare i'imaká, nakojé wawe'epí chuwa: Tupana i'imatari piyuke kaphí Jesucristo chojé péchuruna kapichákajo liyá ripalamane aú, ñakele chuwa unká ajopana ke kalé weká paliyáaka. Piyuke ra'apiyá jema'ajeñojlo nakaje yuró je'echú chu, rimaká rinaku i'imaká ke.

⁷Tupana we'epiri ina'uké mu'ují; riwe'epí kaja piyuke nakaje la'akana. Ripalamane nu'umakale ra'á nuká, nu'umakáloje riyukuna ajopánajlo. ⁸Ajopana, Tupana le'ejena ina'ukena, chá'ataño nuká, e'iyonaja kalé rila'á nuká palá. Ra'á nuká riyukuna i'imajeri, unká judíona kalé i'imakaño nakiyánajlo, raú nawe'epíkaloje Jesucristo nakojé. Unká iná pechu iphálajla ripalamane nakojé we'epíkana lokópa'ala. ⁹Ra'á nuká, nu'umakáloje piyuke nupuráka'alo jema'ajeñojlo ri'imataka ina'uké kapichákajo liyá, kaphí napechu i'imaká aú Jesucristo chojé, yukuna. Júpimi, unká rinakojé we'epíkana i'imalá ina'ukejlo, Tupánaja kalé we'epiri rinakojé i'imaká. ¹⁰Ilé ke rila'aká ina'uké nakú palá aú, rijwa'atéjena, je'echú chiyájena wakára'ajeño, piyukeja yenuwa i'imakaño wakára'ajeño wa'até, we'epiño kapechuni wani riká. Chuwa napechu iphaka, nawe'epíkaloje kaja nakaje ke'iyapejé, Tupana we'epíkare nakojé. ¹¹Riwakára'a wawakára'ajeri Jesucristo marí eja'awá chojé i'imaká, ina'uké i'imakáloje ripalamane. Kaja keja rila'akana i'imaká ripechu nakú. ¹²Kaphí wapechu Jesucristo chojé aú, Tupana wa'atéjena nakiyana

weká. Rijwa'atéjena we'emakale, unká wakero'oló rijwa'até pura'akano. ¹³Riyukuna nu'umakare ijló chona nala'á nuká chapú me'etení. Ila'aniña ujwí ipéchuwa, ilé ke nala'akale nuká. Palani ri'imakáloje ijló penaje nu'umá riyukuna ijló i'imaká.

Íki'ija Jesucristo wátaka ra'apiyá jema'ajeño yukuna marí

¹⁴Palá wani wara'apá Tupana la'aká iká, ñaké i'imakale nutára'ono nu'urúpachi aú rijimaje, nupura'akó rijwa'até kewá. ¹⁵Piyukeja Jesucristo ja'apiyá jema'ajeño, kaja je'echú chu i'imakaño, eja'awá chu i'imakaño wa'até, nakú nemá: “Tupana le'ejena neká”, ke, riyani ne'emakale. ¹⁶Piyukeja la'ajerí Tupana, unká tajnákajo penaje kalé riká. Rijwa'até nupura'akó kewá, numakano rijló Ripechu aú, rila'akáloje iká kaphí péchuruna, ñakeja Ripechu i'imakáloje ijwa'até penaje. ¹⁷Nupura'ó kaja rijwa'até inaku, kaphí ipechu i'imakáloje richojé, ipechu i'imakáloje Jesucristo pechu chuwa penaje. Raú íki'ija iwátajika riká; ñaké kaja iwátajika íki'ija pekowáaka. A'awaná tára'ako kamachá ra'apare chojé, ke kaja i'imajika palá, íki'ija pekowáaka wátakana aú. ¹⁸Raú iwe'epeje palá, ajopana Tupana wa'atéjena wa'até, meke kajrú wánika Jesucristo wátaka ina'uké. ¹⁹Nukeja'a Tupana liyá péchuji ijló, raú iwe'epíkaloje meke kajrú wánika riwátaka iká nakojé. Unká iná pechu iphálajla rinakojé we'epíkana lokópa'ala, íki'ija wani riwátakale iná. Ilé kaje nukeja'a riliyá ijló, i'imakáloje riwátaka ke la'ajeño penaje, i'imakáloje kaja Ripechu ja'apiyá i'imakaño penaje.

²⁰Chuwa, palani Tupana nakú pura'akano palá, riwe'epíkale piyukeja nakaje la'akana. Nakaje, wemakare nakú rijló, rila'akáloje wajló penaje, richájeno rila'alákano wajló riká. Unká méño'oyo wapechu iphálajla nakaje, rila'akare nakojé we'epíkana, lokópa'ala. Ripechu, i'imakare ra'apiyá jema'ajeño e'iyá, palamane aú rila'á nanaku palá. ²¹Palá wánijla ina'uké pura'akojla ñakeja palá Tupana nakú, ri'imatákale rijluwa neká kapichákajo liyá Jesucristo palamane aú. Palá kaja rila'aká ra'apiyá jema'ajeño nakú, rimaká nanaku i'imaká ke. Ñaké ri'imajika.

Tupana Pechu ja'apiyá i'imakana aú

4 ¹Ina'uké wajákelana chu nuká me'etení, Jesucristo yukuna nu'umakale ina'ukejlo i'imaká. Numá ijló, i'imakáloje kaliyáruna Tupánajlo palá la'akaná nakú, ri'iwapakale rijluwa iká. ²Ila'aniña inakuwá nakaje nakuwá we'epéjeño ke wani; i'imá ina'uké wani pajwa'atéchaka. Ijña'á panaku ina'uké, a'ajná

nala'ajika palá ejená, íki'ija iwátakale pekowáaka. ³I'má pajluwa japi keja pajwa'atéchaka, Tupana Pechu ja'apiyá i'imakale, raú palá ipechu i'imajika panakuwáaka ripalamane. ⁴Pajluwaja japi keja neká, piyuke Jesucristo ja'apiyá jema'ajeño. Pajluwa kaja Tupana Pechu, wajwa'até i'imakare; pajluwaja kaja chojé wapechu i'imá kaphí. Tupana i'iwapari rijluwa weká, we'emakáloje palá rijwa'até je'echú chu. Riká la'arí wapechu kaphí. ⁵Pajluwaja wawakára'ajeri, richojeja kalé wapechu kaphí. Riká pajluwaja wa'atéjena we'emakale, nala'á bautizar weká. ⁶Re pajluwaja, piyuke wani ina'ukena chi'inárikana; riká piyuke ra'apiyá jema'ajeño wakára'ajeri; ne'iyá riká Ripecchu aú. Piyuke ra'apiyá jema'ajeño wa'até rila'á nakaje palá.

⁷Jesucristo palamane aú ra'á weká ra'apiyá jema'ajeñojlo we'epíkaje, raú wala'akáloje rijló ke'iyapejé nakaje. ⁸Tupana puráka'alo lana'akéjami chu rimá marí ke i'imaká:

“Jesucristo jácho'oko je'echú chojé ejomi, richá'ata ripiná Jiñá Chi'inárikana i'imaká.

Reyá a'ajemi, ra'á ina'ukejlo we'epíkaje, raú nala'akáloje ke'iyapejé nakaje rijló”, ke rimaká.

⁹¿Meke kemakana chi kele “rácho'oko”, ke? Marí ke kemakánaka riká: Paineke riwitúka'a kawakaje marí eja'awá nakoje i'imaká. ¹⁰Riká penájemi kaja jácho'o je'echú chojé. Yenoje, ritajáka'alo ejé, rácho'o i'imaká, ripecchu i'imakáloje piyuke eja'awá chuwá, piyuke je'echú chuwá wa'ató. ¹¹Riká penájemi a'arí apujlo, apujlo ke, we'epíkaje, nala'akáloje rijló ke'iyapejé nakaje riwátaka ke. Ne'iyajénajlo ra'á we'epíkaje, ne'emakáloje riyukuna ajopánajlo, ajopánajlo ke penaje. Ra'á kaja ne'iyajénajlo we'epíkaje, ne'emakáloje Tupana puráka'alo ja'apátajeño. Ra'á kaja ne'iyajénajlo we'epíkaje, ne'emakáloje ri'imataka ina'uké kapichákajo liyá yukuna ajopánajlo, ajopánajlo ke. Ra'á kaja ne'iyajénajlo we'epíkaje, ne'emakáloje Jesucristo wa'atéjena amájeño. Eyá ra'á kaja ne'iyajénajlo we'epíkaje, newíña'atakaloje ina'uké Ripuráka'alo nakú penaje. ¹²Ilé kaje penaje ra'á apujlo, apujlo ke, we'epíkaje, newíña'atakaloje Jesucristo ja'apiyá jema'ajeño Tupana nakú, kaphí napechu i'imakáloje richaje, richaje ke, riwátaka ke la'akana nakú. ¹³Ilé ke newíña'atajika weká, we'emakáloje pajluwa japi keja weká, palá wani rinakoje we'epíkana ejená, raú wala'akáloje palá Jesucristo ja'apiyá piyukeja Tupana wátaka ke.

¹⁴Chuwa, unká we'emalaje yuwaná ke, mapeja jema'akaño ajopana puráka'alo pajlakaje ja'apiyá; unká kaja wema'alaje

pu'uaré la'ajeño ja'apiyá. **15** Marí ke la'akana palani, wawátakale pekowáaka íki'ija. I'imá richaje, richaje ke, Jesucristo pechu chuwá péchuruna. Iná wíla'aru i'imaká iná napónajlo, ke kaja ri'imaká ra'apiyá jema'ajeñojlo. **16** Pajluwaja iná naponá, eyá piyukeja re'iyá jápakachu palá, peyajweni iná. Ñaké kaja weká Jesucristo wa'atéjena: ra'apiyá i'imakana aú, we'emá pajluwa japi keja pajwa'atéchaka. Íki'ija wawátakachu pekowáaka, richaje, richaje ke, wala'aká Tupana wátaka ke.

Wajé i'imakaje ja'apiyá i'imakaño

17 Marí nakú numá ijlo, wawakára'ajeri apumí chojé ke, jema'akáloje ra'apiyá penaje. Kaja chuwa, i'imaniña jupejé i'imajika ke, pu'uaré la'akaná nakú. La'año mapeja nakaje napechu keja, unká na penaje kalé nakaje nala'akare. **18** Kaja mapechúruna ke neká Tupana nakojé we'epíkana; unká Ripechu i'imalá najwa'até, ne'emakáloje ripalamane raú. Ilé ke najló riká, ijnú nema'akale ra'apiyá, ñakele unká nawe'epila Ripechu ja'apiyá i'imakana nakojé. **19** Kaja ijnú wani nawátaka ra'apiyá jema'akana, raú piyukeja pu'uaré la'akaná a'á rime'é nanakojé, nala'akáloje ñaké penaje. Chuwa, unká napáña'alo nakaje nala'akare ja'apí. **20** Iká we'epiño Jesucristo nakojé, ñakele unká ñaké la'ajeño kalé iká. **21** Kaja jema'á kewákaje puráka'aloji, rewíña'atakare nakú i'imaká, raú iwe'epí riwátaka ke la'akana nakojé. **22** Ñakele iyurí iliyó pu'uaré ila'ajíkare la'akana. Riwakajé, unká iwe'epike naka la'akana i'imakeri palani, raú kalé ila'aké pu'uaré, apo'ojó ipechu i'imajíkale. **23** Chuwa, wajé nakaje, Jesucristo le'ejé i'imakare, nakú i'ijnatá ipéchuwa. **24** I'imá wajé i'imakaje ja'apiyá, palá la'akaná nakuja. Palá wani Tupana la'aká, raú ila'á rila'aká ke. Kewákaje puráka'aloji kemaká chuwá ila'ajé riká.

25 Ñakele chuwa ipajláníña pajwa'atéchaka; imá kewaka pajlokaka. Jesucristo wa'atéjena i'imakale, pajluwa japi keja iká piyukeja.

26 Iyúcha'ajiko ee, ila'aniña pu'uaré rakuwaná. Kiñaja ja'apátaka iyuchá iliyó, ajúwa'aka piyá rijwa'até. **27** Iyuríniña Jiñá Chi'inárikana ka'aká iká pu'uaré la'akaná chojé, iyuchá wa'até i'imajika ketana.

28 Jata'akachi penájemijlo numá: Piyurí piliyó piyuke jata'akaje. Pijapa palani jápakaje nakú, nakaje i'imakáloje pijluwa, wa'até pa'akáloje kaja kamu'ují la'akaño ñathé.

29 I'imaniña chapújra'akajo nakú. Ipura'ó nakaje a'akare ajopana ñathé nakuja, nawe'epíkaloje richaje ke, palá la'akaná

nakú nakoje. ³⁰Tupana a'arí ra'apiyá jema'ajéñojlo Ripechu, nala'akáloje palá ra'apiyá i'imakana aú. Ila'aniña ujwí Ripechu, apo'ojó nakaje la'akana aú. Ripechu, ra'akare wajló aú, wawe'epí rila'ejena ina'ukena weká. Ilé keja ri'imajika wajló, we'ejnajika je'echú chojé ejená. Riwakajé, i'imatákejana wani we'emajika kapichákajo liyá. ³¹Ika'á ipechu nakiyá kele la'arí ima'á ipechu; ika'á kaja inakiyó iyuchá awíyo'okare aú kajrú ajopánajlo; ila'aniña ajopana unká ina'ukélaruna ke ijluwa. Iyurí iliyó ke'iyapejé chapú kaje ipechu nakú i'imakare. ³²I'imá palá péchuruna pajwa'atéchaka; iwe'epí kaja pamu'ujíchaka; amó kaja pachájechaka, chapú ila'akare pekowáaka liyá. Jesucristo palamane aú Tupana amó wachaje, pu'uwaré wala'akare liyá. Ramako wachaje, ke kaja amako pachájechaka, chapú ila'akare pekowáaka liyá.

Marí ke Tupana ja'apiyá jema'ajeño i'imaká pajwa'atéchaka

5 ¹Kaja Tupana yaní nakiyana iká, íki'ija riwátakarena i'imakale, ñakele ila'á palá nakaje, rila'aká ke kaja. ²Iwata íki'ija piyukeja ina'uké, Jesucristo wátaka weká ke kaja. Íki'ija riwátakale weká, ra'á rikó wapumí chojé taka'akájejlo wachaya i'imaká. Palá Tupana nakú ilé ke rila'akana i'imaká.

³Kaja Tupana le'ejena ina'ukena iká. Ñakele i'imá palá pajwa'atéchaka, yuku i'imaká piyá ilérowa inaku: “Nanakiyana la'año namanáicho pajwa'atéchaka; kanakúje'ekena kaja neká”, ke. Ila'á palá, nemaká piyá ilé ke inaku. ⁴Ipura'aniño mapeja pu'uwareni puráka'aloji nakú pajwa'atéchaka; ipura'ó pajwa'atéchaka, palá Tupana la'akare iká nakú. ⁵Iwe'epí marí nakoje: La'año namanáicho, eyá wátaño kajrú nakaje marí eja'awá chu i'imakare najluwa, unká wani i'imalájeño Jesucristo, Tupana wa'até, je'echú chu. Re i'imakaño wakára'ajeño neká. ⁶Jema'aniña pajlákachina puráka'alo ja'apiyá. Tupana wajájikarena neká, unká pachá nema'alá ra'apiyá. ⁷Ila'aniña pu'uwaré najwa'até.

⁸Unká chiyó jema'á Jesucristo ja'apiyá i'imaká, kalajeruni chu i'imakaño ke i'imajika. Eyá chuwa, jema'akale Jesucristo ja'apiyá, mejáma'atani chu i'imakaño ke iká. Ñakele ila'á palá, i'imakale pajluwaja keja Jesucristo wa'até. ⁹Tupana ja'apiyá i'imakana aú iná la'á palá. Ripuráka'alo kewaka i'imakare kemaká ke, ila'aká palá nakaje.

¹⁰Ñakeja i'ijnataka ipéchuwa nakaje, Tupana wátakare ila'aká, nakú; ila'achí riká riwátaka ke. ¹¹Ila'aniña nakaje pu'uwaré la'ajeño la'aká ke kaja, unká na penaje nakaje nala'akare

i'imakale. Imá najló mékeka Tupana kemaká nakaje pu'uaré nala'akare nakú, nawe'epíkaloje rinakojé raú. ¹²Pu'uaré wani nala'aká nakaje, me'echú ne'emaká ewá. Iná apáña'o wani riyukuna i'imakana ja'apí, pu'uaré wani ri'imakale. ¹³Kewákaje puráka'aloji nakojé we'epíkana aú iná we'epí pu'uaré iná la'akare nakojé. ¹⁴La'arí pu'uwaká wajló nakaje wala'akare, i'imari wajló mejáma'atani ke, ñakele nemá nakú:

“Papó, piká kamátakajo nakú i'imaká.

Pácho'o kaja taka'akaño e'iyayá, Jesucristo a'akáloje pijló we'epíkaje, piwe'epíkaloje kewákaje puráka'aloji nakojé raú”, ke nemaká.

¹⁵Ñaké i'imakale, iká Jesucristo ja'apiyá jema'ajeño, a'á inakojó ikó, i'imaká piyá pu'uaré la'ajeño. I'imaniña mapechúruna; i'imá kapechúruna. ¹⁶I'imá palá la'akaná nakú, kajrú pu'uaré la'ajeño i'imakale e'iyowá. ¹⁷Ila'aniña nakaje mapechúwaka; i'imá kapechúruna, iwe'epíkaloje raú naka Tupana wátaka ila'aká nakojé.

¹⁸Iyuwéra'aniño. Yuwéra'akajo pachá iná la'á kajrú nakaje pu'uaré mapeja, mapechúwaka. Lanakiya iyurí ichó Tupana Péchujlo, raú ila'ajé piyuke nakaje ra'apiyá ke palá. ¹⁹Ipura'ó pajwa'atéchaka Tupana yale nakú, Ripuráka'alo nakiyana nakú; ila'á kaphí papechúwaka raú. Jataní Tupánajlo, pu'ují ipechu i'imakale rinaku. ²⁰I'imá ñakeja wara'apá Tupánajlo palá rila'akare iká yukuna piyukeja nakaje aú, wawakára'ajeri Jesucristo ja'apiyá jema'ajeño i'imakale.

Palá Jesucristo wa'atájena i'imakáloje nañakaré chiyájena wa'até penaje yukuna marí

²¹Iphá palá pa'apíchaka, iphákale kaja Jesucristo ja'apí.

²²Numá iká inaana kalúyunajlo: Jema'á palá iluna ja'apiyá, jema'aká Jesucristo ja'apiyá ke kaja. ²³Achiñá wakára'ari riyajalo, Jesucristo wakára'aka ra'apiyá jema'ajeño ke kaja. Riká i'imatari rila'ejena ina'ukena kapichákajo liyá. Iná naponá i'imaká inajlo, ke kaja ra'apiyá jema'ajeño i'imaká rijló. ²⁴Jesucristo ja'apiyá jema'ajeño jema'año palá nawakára'ajeri ja'apiyá, raú numá iká inaana kalúyunajlo, jema'akáloje palá iluna ja'apiyá, iwakára'ajeño ne'emakale.

²⁵Numá iká achiñana kalúyunajlo: Iwata íki'ija iluna, Jesucristo wátaka ra'apiyá jema'ajeño ke kaja. Íki'ija riwátaka ra'apiyá jema'ajeño, raú ra'á rikó taka'akájejlo nachaya i'imaká.

²⁶Ilé ke rila'aká wachaya, we'emakáloje Tupana le'ejena ina'ukena

penaje. Juni aú iná ka'á iná pijá iná napona nakiyá. Ñaké kaja Ripuráka'alo ja'apiyá jema'akana aú, iná yurí iná liyó pu'uwaré iná la'akare. ²⁷Jesucristo iphájika piño majó wakajé, ne'emajé palá, unká japi la'alaño pu'uwaré ke, palá péchuruna ne'emajíkale Tupánajlo. ²⁸Numá ñaké kaja iká achiñánajlo: A'á palá iyajalo inakojó, a'aká inakojó ikó ke kaja. Iwátaka ikó, ke kaja iwátaka iyajalo. ²⁹Unká na kalé amá iná ikó chapú; palá iná a'aká iná nakojó iná ikó. Iná ajná kaja iná a'ajnewá, iná i'imakáloje palá. Ñaké kaja Jesucristo a'aká palá rinakojó weká, ra'apiyá jema'ajeño. ³⁰Rinapona ke rijló ra'apiyá jema'ajeño, ñakele rinapona nakiyana ke weká. ³¹Tupana puráka'alo kemari kaja wá'akajeñomi pajwa'atéchaka nakú: “Pajluwaja keja neká, ke. Ñakele achiñá anúka'aro richi'iná liyá, ri'imakáloje riyajalo wa'até penaje. Raú iyamá neká i'imaño pajluwa japi keja pajwa'atéchaka”, ke rimaká nanaku. ³²Raú kaja rimá Jesucristo, ra'apiyá jema'ajeño wa'até nakú, rimaká aú: “Neká iyamá i'imaño pajluwa japi keja”. ³³Ñaké kaja rimaká wá'akajeñomi nakú, ne'emakáloje pajluwa japi keja pajwa'atéchaka. Rimá achiñá nakú, riwátakaloje riyajalo íki'ija, riwátaka rikó ke kaja. Rimá kaja inanaru nakú, ruyajalóje ruyajná ja'apí penaje.

6 ¹Yuwanajlo numá: Jema'á ichi'iná ja'apiyá, ilé ke la'akana i'imakale palani Tupánajlo. ²⁻³Tupana kemari iyamá th'éla keke nakaje la'akana nakú, Moisés lana'akare ra'apiyá i'imaká, ina'uké i'imakáloje palá ra'apiyá penaje. Ripuráka'alo nakiyana kemari yuwanajlo: “Iphá ichi'iná ja'apí”, ke. Najloja kalé raruká júpija eja'awá chu i'imakana, ra'apiyá jema'akana aú.^a

⁴Iká nachi'inajlo numá: Iyúcha'ataniña iyani; ila'á nenakú palá; jewíña'ata neká palá nakaje Tupana wátakare kaje nakú.

⁵Ajopana wa'até jápajeñojlo numá: Jema'á palá wakára'año iká jápakaje nakú ja'apiyá; iphá kaja na'apí. Ila'á ijápaka'ala palá, iwe'epika rila'akana nakojé lokópa'ala. Jesucristo wa'até jápajeño i'imakaño, ke kaja ijápaka najwa'até.

⁶Apala nayaká'ako ichaje ketánaja ka'ajná ila'aká ijápaka'ala palá, napechu i'imakáloje palá inaku raú penaje. Ila'á ñakeja palá ijápaka'ala, unká namala iká e'iyonaja. Jesucristo wa'atéjena iká, ñakele rijló keja ila'aká piyuke nakaje. Ipechu i'imá palá ijápaka'ala la'akana nakú, Tupana wátaka ke. ⁷Pu'ují ipechu ke, ila'aká ijápaka'ala, Tupánajlo ke ijápaka, unká apú wa'atejlo kalé. Rijwa'até jápajeño ke kaja iká, ijápaka aú ajopana wa'até. ⁸Iwe'epí


a 6:2-3 Pipura'ó Éxodo 20:12 wa'até.

marí: Tupana a'ajeri ina'ukejlo palá nala'akare loko'opáneje riwemí. Ñaké kaja ra'ajika iká, mawemíwaka jápakaño ajopana wa'atejlo, eyá iká jápaño ijluwa, riwemí.

⁹Eyá a'año ajopánajlo jápakaje, najló numá: Ila'á ñaké kaja palá ijwa'até jápajeño nakú. Iwakára'aniña najápaka tejmuji wani aú; iwe'epí re kaja ijápaka'ala minárikana je'echú chu. Rejenowaja iká Tupánajlo, ijwa'até jápajeño wa'até.

Iná jema'aká piyá Jiñá Chi'inárikana ja'apiyá yukuna marí

¹⁰Chuwa nojena, ila'á kaphí ipéchuwa wawakára'ajeri Jesucristo chojé. Chá'atajeri wani riká. ¹¹Re suráanajlo lekareji, namejñátakaloje nekó napinana liyá, nachá'atakaloje neká raú. Ñaké kaja imejñata ikó piyukeja Tupana yuríkare ijlo aú, Jiñá Chi'inárikana chá'ataka piyá iká ripajláka'ala aú. ¹²Unká ina'uké, marí eja'awá chu i'imakaño wa'até, kalé wala'á pinakaji. Wala'á pinakaji jiñana wakára'ajeño, unká iná amálarena, yenuwa i'imakaño wa'até. Neká wataño wachá'atakana. Neká wakára'año ina'uké, we'iyá i'imakaño, la'aká pu'uaré wani marí eja'awá chu. ¹³Ñakele a'á inakojó piyukeja Tupana yuríkare ijlo i'imaká, raú imejñátakaloje ikó Jiñá Chi'inárikana wa'atéjena liyá, chapú kaje i'imajika ijlo wakajé. Kaphí Tupana chojé i'imakana aú, ichá'ataje Jiñá Chi'inárikana wa'atéjena.



¹⁴Suráana a'año kaja nanakuwá nawachaphila, namejñátajona penaje. Ke kaja ijló kewákaje puráka'aloji chuwa' i'imakana aú, imejñátakaloje ikó Jiñá Chi'inárikana chapujré liyá. Suráana a'año pejru'uwá melanani, ne'ekú pajré mejñátajona penaje. Ke kaja ijló kaphí ipechu i'imakana aú Jesucristo chojé, ila'akáloje piyukeja palá, raú ichá'ataje Jiñá Chi'inárikana. ¹⁵Suráana a'año kaja ne'ema'ulá, ne'ejnakáloje nókajo richu penaje. Ke kaja ilamá'ata ikó, i'ijnakáloje Jesucristo yukuna i'imajé ajopánajlo, raú napechu pala'akóloje Tupana wa'até. ¹⁶Ipechu i'imá kaphí Tupana chojé, piyuke Jiñá Chi'inárikana le'ejé chapú kaje chá'ataka piyá iká. Iná pechu i'imakachu kaphí richojé, jemú mejñátaka suráana napinana lekare liyá, ke kaja riká. ¹⁷Re kaja suráana wíla'aru mejñátajona, ijijila mujlúka'aka piyá pewíla'aruya. Ke kaja Jesucristo wajló, ri'imatákale weká kapichákajo liyá. Suráana noño napinana nakiyana najo'ojowa aú, ke kaja Tupana puráka'alo lana'akéjami, Ripechu la'akare pu'uwaká wajló. Ilé ke wajló lekareji Tupana a'akare.

¹⁸Iyuríniña Tupana wa'até pura'akano iliyó; ikeja'a nakaje riliyá, Ripechu kemaká ijló ke. I'imá kaja kapechúruna rijwa'até pura'akano aú; ila'aniño ujwí rijwa'até pura'akano liyá. Ipura'ó rijwa'até rile'ejena ina'ukena nakú. ¹⁹Ipura'ó kaja rijwa'até nunaku, ra'akáloje nuñathé nu'umajika kewá riyukuna ajopánajlo. Ipura'ó kaja nunaku, kaphí nupechu i'imakáloje riyukuna i'imakana nakú, riyukuna jema'ajeño we'epíkalaje ri'imataka iná kapichákajo liyá yukuna nakoje raú. Me'echuje riyukuna we'epíkana i'imaká ina'ukejlo júpimi i'imaká. ²⁰Tupana wakára'ari nuká, nu'umakáloje riyukuna ajopánajlo; riyukuna i'imakana chona maare nuká ina'uké wajakelana chu me'etení. Ipura'ó kaja rijwa'até nunaku, nukero'okó piyá riyukuna i'imakana najló, riwátaka ke.

Kaja penaje Pablo kemakare nakú najló marí

²¹Tíquico, palá wani nupechu i'imakare nakú, kemájeri ijló nunaku mékeka nuká maare, na nakú nuká. Palá ra'aká nuñathé Tupana jápaka'ala la'akana aú. ²²Rimakáloje ijló mékeka weká maárowa penaje nuwakára'aje riká ichaje, rila'akáloje palá ipechu raú penaje. ²³Nuwata Jesucristo, rara'apá Tupana wa'até, la'aká palá ipechu, ikawíla'ako piyá nakaje nakú. Nuwata kaja iwátaka íki'ija pekowáaka, wa'até ipechu i'imaká kaphí Tupana chojé. ²⁴Nuwata rila'aká inaku palá; nuwata kaja rila'aká palá piyuke neká, unká yurílaño naliyó Jesucristo wátakana íki'ija. Ilé ke nuwátaka ri'imaká ijló.

Kaja.